

Dumonda Deplazes concernent la dumonda "È la cassa da pensiun dal Grischun preparada per l'avegnir?"

Per che la cassa da pensiun dal Grischun saja fitta per l'avegnir, stuess ella s'occupar cun ils svilups ils pli novs en l'industria da finanzas e betg manchentar la tendenza envers ina strategia d'investiziun che tegna quint dal clima. Per savair nua che la cassa da pensiun stat actualmain è ina circulaziun transparenta d'informaziuns da gronda impurtanza.

Cun la midada dal clima provocada da l'uman stat la cuminanza mundiala davant ina gronda sfida. Per che nus possian tegnair l'augment da la temperatura en il rom dals 1,5 (maximalmain 2) grads concludids cun la cunvegna davart il clima da Paris, che la Svizra ha ratifitgà, dovri sforzs sin tut ils plauns. L'artitgel 2.1c da la cunvegna davart il clima fixescha ch'ils currents finansials stoppian esser cumpatibels cun la finamira dad 1,5 fin 2 grads. Vitiers vegn ch'il regulatur decisiv per la Svizra en il sector dal clima vegn bain ad esser sia piazza da finanzas. Perquai che en Svizra vegnan administrads passa 6000 milliardas francs. Quai è 10 giadas dapli che la prestaziun economica svizra dal product naziunal brut. En cas da decisiuns d'investiziun ston er las consequenzas per la midada dal clima vegnir resguardadas sistematicamain. Perquai èsi d'ina impurtanza essenziala ch'ils acturs publics en il sector da finanzas contribueschian lur part ad in svilup che tegna quint dal clima. Quai è pussaivel senza perditas finansialas: Investiziuns favuraivlas al clima han schizunt ina meglra performanza rectifitgada concernent las ristgas che investiziuns convenziunalas (cf. uffizi federal d'ambient [UFAM; 2016]: Strategias d'investiziun favuraivlas al clima e performanza).

Il studi dal UFAM (2017) ha mussà che las cassas da pensiun svizras finanzieschan ina stgaudada dal clima da 4 fin 6 grads – pia lunsch davent da quels 2 grads en mira ch'èn vegnids fixads da la cunvegna davart il clima da Paris. En spezial ovras electricas a charvun èn fitg nuschaivlas per il clima, pervia da quai sto quest purtader d'energia svanir uschè svelt sco pussaivel or dal mix mundial d'energia. Quai fa ch'igl è fitg ristgà d'investir en charvun: Or da ponderaziuns da rendita e da ristga han per exempel la cassa da pensiun svizra la pli gronda, la PUBLICA, ed ultra da quai er la cassa da pensiun dal chantun Turgovia (BVK) desinvestì areguard il charvun.

Entant ch'i vegnan promovidas mesiras politicas favuraivlas al clima cun meds finansials publics fissi ultra da quai ina cuntradicziun, sch'il maun public sustegness il cuntrari cun sia strategia d'investiziun. I vala qua da cuntanscher ina coerenza en la politica. Ina basa e premissa perquai è da stgaffir dapli trasparenza concernent ils effects da las investiziuns d'instituts da finanzas publics per il clima.

1. È er la regenza da l'avis ch'igl è impurtant or d'ina vista generala sociala ch'ils effects da las investiziuns da la cassa da pensiun per il clima vegnian publitgads en moda transparenta? Sche gea, co vegn quai garantì e quant gronds èn ils effects da las investiziuns da la cassa da pensiun dal Grischun per il clima?
2. È er la regenza da l'avis ch'igl è impurtant or d'ina vista generala da l'economia da manaschi che las ristgas finansialas da las investiziuns da la cassa da pensiun, che resultan da la midada dal clima (ristgas climaticas), vegnian publitgadas en moda transparenta per pudair reagir en moda proactiva sin eventualas ristgas da la stabilitad (grad da cuvrada)? Sche gea, co vegn quai garantì e quant grondas èn las ristgas climaticas?
3. Sustegna la regenza sut quest aspect la desinvestiziun da la cassa da pensiun dal Grischun areguard interpresas che fan la gronda part da lur svieuta cun affars concernent la produenziun da charvun, da gas, d'atom u dad ieli mineral? Sche gea, co vegn quella garantida? Sche na, pertge vegn refusada questa desinvestiziun?
4. Co pensa la regenza da garantir che la cassa da pensiun dal Grischun tegnia sias investiziuns en il rom da la strategia da sbassament da maximalmain 2 grads, sche pussaivel dad 1,5 grads?
5. Tge basas legalas (leschas, ordinaziuns) stuessan vegnir midadas per garantir la trasparenza da las investiziuns da la cassa da pensiun dal Grischun concernent ils effects per il clima (Tge effects per il clima han las investiziuns?) e concernent las ristgas climaticas (Quant gronds èn ils effects da la midada dal clima e quant bunas èn las mesiras cunter quests effects per il svilup da la valur finanziaria dals daners da la prevenziun professiunala?)

Cuira, ils 14 da favrer 2018

Deplazes, Atanes, Baselgia-Brunner, Bucher-Brini, Cahenzli-Philipp, Caviezel (Cuira), Dermont, Dosch, Epp, Jaag, Joos, Kappeler, Kollegger, Kunfermann, Locher Benguerel, Monigatti, Perl, Peyer, Pfenniger, Pult, Tenchio, Thöny, von Ballmoos